

112 學年度第一學期 八年級 本土語補考試卷

- 請抄第五課〈九二一的故事〉課文一遍
- 文字請保持工整，若無法辨識或過於潦草需重新罰寫。

九二一大地動了後，我載規卡車的賑災物件，對臺南駛車經過集集去到埔里。看著美麗島的田園裂做一條一條的深溝，清水溪橋倒佇溪水的身邊，已經無聲嘛無氣矣。中寮的路邊，有三百外具棺木囤佇路邊，真正是悲情的庄跤。青翠的九十九峰，禿額禿額，無閣青翠。宏仁國中的運動埕 thiàn-tooh 搭甲滿滿，挨挨映映，親像咧大露營。有一个阿公憂頭結面跼佇路邊，阿孫煞褪腹裊佇溪仔邊歡歡喜喜咧洗身軀，毋知大人的心酸。『麥當勞』阿叔倒佇水溝邊，規身人 癩瘡爛癆，毋知當時才會閣賣馬鈴薯條？

停佇亭仔跤的轎車攏哲甲扁扁扁，學校的教室倒甲離離離，阿婆仔佇碎糊糊的教室邊仔，那揀救濟的衫仔褲，那幌頭吐氣，講：「天壽喔！地動若是佇日時，毋知 欲哲死佱濟學生囡仔？」田嬰無閣飛，水雞無閣唱歌，學校的鐘聲也無閣響。干焦賸蠅蚋蟻吼無停，加添百倍的悲情。直升機佇天頂飛來飛去，共米糧載來，共斷跤斷手的災民載走。一个戇神戇神的囡仔共紙撈的飛行機射去天頂，流目屎講：「阿爸、阿母，恁佇佗位？」彼暝我跼佇埔里基督教謝緯營地，義工攏是日本人，有神戶來的手鐘團，有山梨縣來的塗水師恰木工，上少年的是十五歲高中生咧鬥跤手起便所，上老的是七十外歲的阿婆來共災民鬥洗衫仔褲，閣有老阿公共日本的工課放咧，來到牛欄山頂咧修理破厝。隔一禮拜，我募著規車的新衫恰布篷，送到爽文國中，向望中寮的學生囡仔毋免佇日頭跤讀冊，毋免穿破衫仔褲，毋免予烏蠅叮。